

দূরবীণে ভাসা জীবন – এক

মেলবোর্ণ, অস্ট্রেলিয়া থেকে

আবিদ রহমান

অহংকারী ও অধৈর্য মহিলা বলতে যা বোঝায় আমার জন্মদাত্রী ছিলেন তাই। কোন কিছু একবার মাথায় এলে সেটা সেই মুহূর্তেই করা চাই। সন্ধ্যায় হয়তো কোন আত্মীয় উনাকে একপ্রস্থ কাপড় উপহার দিয়েছেন তা রাতের মধ্যেই সেই কাপড় সেলাই করে তিনি কোর্তা বানিয়ে পরতেন। অথচ হাই পাওয়ারের চশমা পরেও তিনি চোখে ভালো দেখতেন না। রাতে হয়তো মনে হলো গ্রামের বাড়ির খোঁজ-খবর নেয়া দরকার, ভোরে কাজের ছেলে দিয়ে বেবী ট্যান্ডি ডেকে সোজা সায়েদাবাদ বাসস্ট্যান্ড। বাসে চেপে বাড়ী-তিনি ছিলেন হাই ব্লাড প্রেসার ও টারমিনাল ডায়াবেটিস রোগী। জমিদার বাড়ীর বড় মেয়ের দাপট মৃত্যুর দিন পর্যন্ত ছিলো উনার। মানুষকে উনি সম্মান জানাতেন বংশ পরিচয়ের মাপকাঠিতে। বাড়ীতে বন্ধু-বান্ধব এলে আগে খোঁজ করতেন কোন বাড়ির কার ছেলে। তাদের পারিবারিক মর্যাদার ভিত্তিতেই আপ্যায়ন-আদায়ের ব্যবস্থা হতো। এতো কিছু পরও তিনি মানুষের বেশ পছন্দের ছিলেন দুটি কারণে। অন্যের জন্যে দয়া-মমত্ববোধ এবং অসম সাহসের জন্যে।

আমার জন্মদাত্রী জীবনের শেষ দু'টি যুগ কাটিয়েছেন আদরের মেজো ছেলের সান্নিধ্যে, শীতের দেশ সুইডেনে। তবে কখনো ছেলের গলগ্রহ হয়ে তাঁর সংসারের সুখে 'হার্ডি' হয়ে দাঁড়াননি। পেনশনের সামান্য আয়ের ভরসায় একা থেকেছেন ছেলের পাশের বাড়ীতে যাতে করে প্রাণপ্রিয় ছেলেকে প্রতিদিন না হলেও নিয়মিত যেন দেখতে পারেন। জুনিয়র স্কুল পাশ দেয়া জন্মদাত্রীর বাংলা ভিন্ম অন্য কোন ভাষা জানা ছিলোনা- তবু তিনি একাকী থেকেছেন ভিন্মভাষী এক ভুবনে। প্রতি বছর একবার উড়ে আসতেন বাংলাদেশে, নিজের শশুরের ভিটেয়, প্রতিবেশী মানুষগুলোর খবরা-খবর নিতে। উনার আসার সংবাদে গ্রাম জুড়ে উল্লাস নামতো, যেন সাক্ষ্য ইউনিসেফ গ্রামে এসেছে। কারোর মেয়ের বিয়ে, কেউবা অসুস্থ, কারো সদ্য তালুক হয়েছে-এমন সব মানুষগুলো ভীড় জমাতো বাড়ীর উঠানে। দু-তিন জন কাজের মানুষসহ সংসারে মোট চার-পাঁচজন লোক। তবুও দিনে আধমণ চালেও খাওয়ায় টান পড়তো। কৃপন মানুষের জীবন-যাপন করে সুইডিশ সরকারের দেয়া পেনশনের টাকা জমিয়ে গ্রামে বিলি বন্টন করতেন। সারা বছরের ধান-চাল বর্গাচারীদের থেকে বুঝে নিয়ে সেগুলো দিতেন প্রতিবেশী অভাবীদের। মৃত্যুর চারমাস আগে তিনি শেষবার গ্রামে গিয়েছিলেন। আমাদের এক তরুন প্রতিবেশী তখন 'বেদনার রোগী' (গ্যারিস্টিক আলসারের রোগীকে আমাদের এলাকার লোকজন বেদনার রোগী ডাকে)। তাকে কুড়ি হাজার টাকা দিলেন- চিকিৎসার জন্যে পাঁচ হাজার টাকা, তিন মাসের খোরাকী ছয় হাজার টাকা। বাদবাকী নয় হাজার টাকা একটা ছোট দোকান করার পুঁজি।

চারমাস পর প্রাণপ্রিয় সন্তানের কোলে মাথা রেখে আমার জন্মদাত্রী সুইডেনে মারা যান। ভাগ্যক্রমে আমি তখন ব্যবসায়িক কারণে সপরিবারে ঢাকায়। চারদিন পর লাশ বাংলাদেশে আসবে। একমাত্র চাচাকে নিয়ে বাড়ী গেলাম কবরসহ অন্যান্য জোগাড়-যন্ত্র করতে। সংগে আমার প্রতিবেশী ও গ্রামের অন্যান্য শুভাকাঙ্খীরা। তখন মশল বর্ষার মরশুম। জলাবন্দিতা থেকে জমির ধান বাঁচাতে কৃষকরা জমির আল কেটে দিয়েছেন। ফলে আমাদের পারিবারিক গোলস্থানে যাবার রাস্তাটায় ছোট একটা কাটা। যেকোন মানুষ হালকা লাফে পেরুতে পারবে, তবে পারিবারিক বয়োবৃদ্ধ মরুবীদের কথা ভেবে আমি প্রস্তাব করলাম রাস্তাটা ঠিকঠাক করার। আমার হিসেবে ১০/১৫ ঝুড়ি মাটি ফেললেই কাজ হবে। আমার জন্মদাত্রী যে তরুনটিকে কুড়ি হাজার টাকা সাহায্য করেছিলেন মাস চারেক আগে, সে আগ বাড়িয়ে জানালো, কাজটা এক কামলার কাজ। রাগ হলো কারণ প্রতিবেশী হিসেবে আমি এই সামান্য সহায়তা চাইতেই পারি এবং এটাই আমাদের গ্রামের রীতি-রেওয়াজে। জিজ্ঞেস করলাম, কামলার রোজ কত। তরুনটি জানালো, দৈনিক দেড়শ, কিন্তু যেহেতু কাজটা মুর্দা বাড়ীর সেহেতু দু'শ টাকা দিলেই চলবে। রাগে ক্ষোভে রাজী হলাম। আমার জন্মদাত্রী এদের জন্যে এতো করার পরও ১৫ ঝুড়ি মাটি পেতে পারেন না বিনামূল্যে?

সিদ্ধান্ত নিলাম মায়ের কুলখানি করবো এতিমখানায়। এই অকৃতজ্ঞ মানুষগুলোকে খাইয়ে লাভ নেই। চাচাই সব ব্যবস্থা করলেন। নির্ধারিত দিনে খুব ভোরে বাড়ী পৌঁছালাম। পুকুর ঘাটে এক মাওলানা সাহেবের সাথে দেখা। হুজুর তখনো জানেননা এতিমখানায় আমার কুলখানির ব্যবস্থা হয়েছে। আমাকে দেখেই সালাম দিয়ে জানতে চাইলেন, চাচীম্মার (আমার মা) কুলখানি কখন করবো। উত্তর দেয়ার আগে মনে পড়লো, মাসখানেক আগে মাওলানা সাহেবের বড় ভাইসাহেব (আসলাম ভাই) ইস্তেকাল করেছেন। পালটা জিজ্ঞেস করলাম, আসলাম ভাইয়ের কুলখানির খবর কী। মওলানা সাহেব জবাবে জানালেন, মিলাদ আমরা ঘরে ঘরে পড়ে ফেলোছি বাইরের কাউকে বলিনি। আমার চাঁদি তেঁতে ছিলো। একই সুর আমি বললাম, আমরাও ঘরে ঘরে মিলাদ পড়ে

নেবো। তারপর বাড়ীর দিকে হাঁটা শুরু করলাম। হাঁটতে হাঁটতে মনে পড়লো, জনের পর আজ অবধি কোন দিন কোন মোল্লা-মৌলভীর বাড়ীতে মিলাদের দাওয়াত পাইনি। তাহলে কী মোল্লা-মৌলভীদের বাড়ীতে কারো জন্ম-মৃত্যু হয়না নাকি তাদের আল্লাহ 'মিলাদ' না পড়ার কনসেশন দিয়েছেন!

আপনারা কেউ কোনদিন কোন মোল্লা-মৌলভীর বাড়ীতে মিলাদের দাওয়াত পেয়েছিলেন? সৌভাগ্যবানরা যদি দয়া করে আমাকে জানাতেন।

দূরবীণে ভাসা জীবন - দুই

মেলবোর্ণ, অস্ট্রেলিয়া থেকে

আবিদ রহমান

হারাম ভাসে-ডুবে হালালের জলে

এখানে আমাদের এক পারিবারিক বন্ধু আছেন যার সাথে বেশ উঠাবসা। সম্পর্কটা বেশ জমজমাট ও আন্তরিক। বহুবার একসাথে বেড়াতে যাবার প্ল্যান করেও পিছিয়ে যেতে হয়েছে বিভিন্ন কারণে। তবে সব কারণ উপচিয়ে যে অকারণটি মুখ্য হয়ে উঠে, সেটি হচ্ছে হারাম-হালালের বাছ-বিচার। বন্ধুটি আমার হালাল ছাড়া খেতে চান না। এ ব্যাপারে উনি আপোষহীন।

বন্ধুটিকে নিয়ে ইন্ডিয়ান রেফ্রুয়েন্টে যাওয়া যায়না। ম্যাকডোলানড কিংবা অন্য ফাস্ট ফুডতো পরের ব্যাপার। তবে হালাল বলে 'নান্দোস' চিকেন খান, যদিও এই ফ্রানচাইজের অধিকাংশ মালিক চৈনিক কিংবা অমুসলিম। অথচ আমার কটর মোল্লা একমাত্র দুলাভাই বে-নামাজীর রান্না খেতেন না। হান্টিংডেল মসজিদের ইমাম সাহেব খান বলে আমার বন্ধু একমাত্র এন্ডিয়ুভার হিলস'র 'কেএফসি' খান। অন্য কোন 'কেএফসি' তে উনার আস্তা নেই। উনাকে বোঝানো যায়না যে সব 'কেএফসি'র মুরগী একই সূত্র থেকে আসে- যতদূর জানি সব 'কেএফসি'র মুরগী যোগান দেয় 'ইংগাম'। নোবেল পার্কের হালাল মুরগীর দোকানেও 'ইংগাম'র বিশাল এক সার্টিফিকেট ঝোলে। বন্ধুটি এক দোকানের 'ইংগাম' চিকেন খেতে দ্বিধা করেন না আবার অন্য দোকানেরটায় হালাল এটা বিশ্বাস করেন না। হালাল পিৎজা খুঁজতে গিয়ে খাওয়ার অযোগ্য পিৎজা নিয়ে ঘরে ফেরেন। গিয়ে উনাকে বোঝানো বেশ কষ্ট। মাঝে মাঝে বেশ রাগ হয়।

গেলো বছর ডিসেম্বরে দু'জনেই দেশে গেছি। আমি গেছি ঈদের আগে। উনি ঈদের পরে। ঈদের দু'দিন পর আমার শশুর বাড়ীর এক অনুষ্ঠানের জন্যে মুরগী কিনতে বাজারে গেছি। দোকানপাট তখনো ভালো করে খোলেনি। বাধ্য হয়ে সালাদের জন্যে চিমসানো শসা-টমেটো কিনতে হলো। কোরবাণী ঈদের পর পর বলে ভাবলাম অনেকে হয়তো গরু-ছাগলের মাংস খেতে চাইবেন না, পাঁচ-ছ'টা মুরগী কিনে নেই যদি প্রয়োজন হয়! একটা মাত্র দোকান খোলা- আমি সহ বেশ কয়েকজন খন্দে। ১৫/১৬ বছর বয়সী একটা ছেলে মুরগীর ওজন নিচ্ছে আর ভেতরে গিয়ে জবাই দিচ্ছে। অবাধ ভাবলাম ছেলেটি একা একা কিভাবে মুরগী জবাই দিচ্ছে? জবাইয়ের সাথে সাথে একটা বড় ডামে মুরগীগুলোকে ছুঁড়ে দিচ্ছিলো। ব্যাপারটা কল্পনায় আঁকা একান্তরের বধ্যভূমির মতো, অসহায়ের মতো পরস্পরের দিকে তাকিয়ে মৃত্যুবরণ। মুসলিম অধ্যুষিত দেশে জবাই করা হয়েছে বলে মুরগীগুলো হালাল হয়েছে। কেউ কখনো জানতে চাননি জবাইয়ের আগে কলেমা পড়া হয়েছিলো কি! যে ছেলেটি মুরগীগুলো জবাই দিয়েছে সে মুসলিম ধর্মাবলম্বী বা পাক-পবিত্র ছিলো কিনা। এতসব জানা হয়নি। অবশ্য আমার মেলবোর্ণ প্রবাসী বন্ধুটি সেই অনুষ্ঠানে এসে বেশ কায়দা করে রসিয়ে রসিয়ে মুরগীর মাংস খেয়েছিলেন।

মাসখানেক পর বন্ধুটি আরেকবার আমার সাথে দেখা করতে এলেন। তখন মধ্য দুপুর। পাড়ার রাস্তায় তখন ফেরী ওয়ালাদের উচ্চকণ্ঠ দাপট। শজি, মাছ, মুরগী বিক্রির দূরন্ত প্রতিযোগীতার মাঝে আমরা দুজন বারান্দায় দাঁড়িয়ে বিড়ি ফুঁকছি আর বহুদিন পর হঠাৎ করে দেখা হওয়া প্রসুতিভূর্তিকা পুরোনো প্রেমিকার সাথে গ্রাম্য এবড়োথেবড়ো পথে বন্ধুর রিক্সা ভ্রমণের রোমান্টিক গল্প শুনছিলাম। আমার শ্যালক-বধু এসে মুরগীওয়ালার সাথে পাকা কুশলী দরাদরি শেষে দু'টো মুরগী কিনলো। মুরগীওয়ালা ডেনের পাশে পায়ের নীচে ফেলে মুরগী দু'টোকে জবাই দিয়েই পালক ছেঁড়া শুরু করলো। তখনো মুরগী দু'টো বেশ জ্যান্ত। আমার হালাল-অন্তপ্রাণ বন্ধুটি নির্বিকার দাঁড়িয়ে দৃশ্যটা দেখলেন। ব্যাপারটা তাকে স্পর্শ করেছে বলে মনে হলোনা। তবে আমার মনে হলো, হালাল ব্যাপারটি

অনেকটা সূচীবায়ুর মতো। দেশের মাটিতে যেটা হালাল হয়ে যায় বিদেশের মাটিতে সেটা হালাল হয়না। অনেকে হালাল-হারামের বিষয়টিকে যতোটা না ধর্মীয় দৃষ্টিকোণ থেকে দেখেন তার চেয়ে বেশী দেখেন সামাজিক সংস্কারের মানদণ্ডে। হালাল খাবার তীব্র ইচ্ছে থাকলে হারাম রোজগার পকেটে নিয়ে হালাল মাংসের দোকানে ছুটতেন না।

হংকং প্রবাস জীবনে অনেক গুণী প্রতিভার সাথে পরিচিত হবার সুযোগ হয়েছিল। কখনো কখনো এই পরিচিত বন্ধুত্বের গডিতে গড়িয়েছে, আন্তরিকতার কোমল স্পর্শে স্নাত হয়েছিল। আবার অনেকের সাথে খুব উঠা বসার পরও কেনো জানিনা নিবিড় খাতির জমে উঠেনি। এ-রকম একজন মানুষের প্রসংগ। তার নামধাম বলবোনা। উত্তরবংগের এক জেলা শহরের মানুষ। গান-বাজনা আর শিল্প-সাহিত্য নিয়ে মাতামাতি করেছেন দীর্ঘদিন। কোনো এক বেতারের নিয়মিত শিল্পীও ছিলেন। সত্যি-মিথ্যে জানিনা, শুনছি প্রেম করে বিয়ে করেছিলেন এক মেডিক্যাল ছাত্রীকে। নিজে ছিলেন সরকারী কর্মকর্তা। সে ঘরে ফুটফুটে এক কন্যাও ছিলো। জীবন-জীবিকার টানে একসময় দেশ ছেড়েছেন, ছেড়েছেন সরকারী চাকুরী, প্রেমের বিয়ে করা বউ আর নাড়ির টানের আদুরে কন্যা-সন্তান। বিদেশে বসবাসের মোহে বিদেশী নাগরিককে নতুন জীবন সংগীনি করেছেন। চীনা **ফুজাও** নিয়ে খিতু হয়েছেন হংকংয়ে।

ধরা যাক, উনার নাম, মুনসী। সরকারী উচ্চপদস্থ কর্মকর্তা **ফুজাও** আয়ের সুবাদে মুনসী ভাই সারাদিন গায়ে হাওয়া লাগিয়ে ঘুরে বেড়াতেন। এর-ওর অফিসে কুশল বিনিময়ের নামে সময় কাটানোর ঝামেলা মেটাতেন। মুনসী ভাই চলনে-বলনে সৌখিন ও পরিপাটি-আদব-তমিজের প্রতিযোগিতায় উনাকে হারানো বেশ দুর্লভ ব্যাপার। বিদেশিনী হলেও ভাবী ছিলেন অনন্য সাধারণ একজন মানুষ। বাংগালী স্বামীর খুশী ও তৃপ্তির স্বার্থে ভাবী বাংগালী ভাবীদের সাথে বেশ খোলামেলা আন্তরিক যোগাযোগ রাখতেন। নিজের চেষ্টায় কিছু বাংলা বলতেও শিখেছিলেন। বাংলা বুঝতেনও ভালো। স্বাভাবিক কারণেই উইক এন্ডের বাঙালী দাওয়াতে মুনসী ভাই ও ভাবী ছিলেন নিয়মিত অতিথি।

কোনো ঘরোয়া দাওয়াতে গেলেও যে গিফট নিতে হয় তা আমি মুনসী ভাইকে দেখে শিখেছি। বেশ দামী গিফট নিয়ে মুনসী ভাই ঘড়ির কাঁটা ধরে সপরিবারে হাজির হতেন। উনার কাঁধে ঝোলানো ব্যাগে থাকতো এক বোতল ব্ল্যাক লেভেল ও এক বাল্ল তাস। সন্ধ্যার পর আড্ডায় স্কচ হুইস্কি অন রকস্ গিলতে গিলতে মুনসী ভাই তাস খেলার সংগী খুঁজতেন। দাওয়াতে অবশ্যই মানুষজনের কমতি হতো না। তবে মুনসী ভাই খুঁজতেন 'জেনুইন প্লেয়ার' মানে যারা পয়সার বিনিময়ে তাস খেলবেন। আমরা বহুবার বোঝানোর চেষ্টা করেছি, টাকা-পয়সার বিনিময়ে তাস খেলা হচ্ছে, জুয়া। তিনি মানতেন না, মানতে চাইতেন না। তাঁর যুক্তি ছিলো ভিন্ন। প্রতিটি স্পোর্টসের এক এক কায়দা কানুন থাকে। তাসও একধরনের স্পোর্টস এবং এ-খেলার মূল আকর্ষণ টাকা-পয়সা। আমরা কেউই মুনসী ভাইর এ যুক্তির সাথে একমত হতাম না বলে, তিনি বাধ্য হয়ে আমাদের সাথে 'দুধ-ভাত' বা বাচ্চাদের তাস খেলা খেলতেন। নারীসংগও ছিলো মুনসী ভাই'র খুব প্রিয়। তিনি সুন্দরী-অসুন্দরী বাচ-বিচারের ঝামেলায় যেতেন না, তরুণী হলেই হলো। উনি কথা বলার জন্যে হামলে পড়তেন। কারো অফিসে উনার আনাগোনা বেড়ে গেলে আমরা নিশ্চিত হতাম, সেই অফিসের যুবতী কর্মচারীটিই মূল আকর্ষণ।

স্কচ হুইস্কি মুনসী ভাইকে বেশ টানলেও মুনসী ভাই বেশী টানতে পারতেন না। এখানেই উনার অর্ধ ভোজন হয়ে যেতো। গ্লাসে ঢালা মাত্রই মুনসী ভাই'র মধ্যে এসে পড়তো একটা ভাব। স্বাভাবিক নিয়মে দু'তিন ঘন্টা আড্ডার আগে খাওয়া পরিবেশন হতোনা। তাছাড়া অনেকেই বাঙালী নিয়মে ছিলেন 'লেট লতিফ'। সংগত কারণেই খাওয়া যখন পরিবেশন হতো তখন মুনসী ভাই পুরোপুরি না হলেও বেশ মোতাত। অন্য আর সব মাতালের মতোই উনি নিজের বাব-মা ছাড়া অন্য সবাইকে গাল-মন্দ করতেন। ম্যানিব্যাগসহ নিজের জিনিষপত্র খোঁজাতেন না এবং সর্বোপরি নিজের বাড়ীর রাস্তা ভুলতেন না। মোতাত হলেও উনার সমস্যা হতোনা, কারণ ভাবী অবস্থা বেগতিক দেখলেই ট্যান্সি ডাকতেন। টলমল পায়ে খাবার টেবিলে গিয়ে বারবার হোস্ট পরিবারকে বিব্রত করতেন, ভাই মাংসটা হালালতো? উনি হালাল নিশ্চিত না হয়ে কিছুই খেতেন না।

আমাদের আরেক ছোট ভাই ছিলো ইকবাল। চীনা ভাষা জানা ছাড়াই ইকবাল চৈনিক কাপড় প্রস্তুতকারী কোম্পানীতে মার্কেটিং ম্যানেজার ছিলো। স্থানীয়রা ইকবাল উচ্চারণ করতে পারতেন না, ওকে ডাকতেন 'আই কিউবল'। পেশাগত কারণেই ইকবাল-কে মিসরসহ মধ্যপ্রাচ্যের বিভিন্ন দেশে হরহামেশাই যাতায়াত করতে হতো। একবার কোন এক মুসলিম দেশের ডিউটি ফ্রি'তে ইকবাল আরবী লেখা মোড়কে থেকে ব্ল্যাক লেভেল পেয়েছিলো। এনেই মুনসী ভাইকে গিফট, মুনসী ভাই এবার আপনার জন্যে হালাল ব্ল্যাক লেভেল এনেছি। উত্তরে মুনসী ভাই'র তিরস্কার, মদ কখনো হালাল হয়? সোজাসাপটা ইকবালের জবাব, দেখেন না পুরো মোড়কটাই আরবীতে লেখা, হালাল না হয়ে যাবার উপায় আছে? আমরা নিয়মিত মদ্যপান করতে পারি, অন্য মেয়েমানুষের

সংগে নির্দিধায় ভালবাসা নির্মাণে ব্যস্ত হতে পারি, কেবল হালাল মাংস ছাড়া খেতে পারিনা কেনো? ব্যাপারটা কি ধর্মীয় নাকি প্রচলিত সংস্কার!

হারাম-হালাল কিংবা সংস্কারের প্রসংগে খুব ছোটবেলার একটা ঘটনার উল্লেখ না করে পারছি না। আমি তখন প্রাইমারীর ছাত্র, পুরো ঘটনাটি স্পষ্ট মনে নেই, তবে কাঠামোটা সুস্পষ্ট। আমার গ্রামের বাড়ী জগন্নাদীর্ঘি ইউনিয়নের বিজয়করা গ্রামে। আশেপাশের গ্রামগুলোর নাম রতনপুর, লক্ষ্মীপুর, নারায়ণকরা, রামপুর। নামই বলে দেয় এক সময় এ এলাকায় হিন্দুদের দাপট ছিলো। বৃটিশ আমলে আশেপাশে বেশ কয়েকজন পাতি জমিদারও ছিলেন হিন্দু। এখনো বেশ কয়েকটি পরিত্যক্ত ঠাকুরবাড়ী ও ধ্বংসপ্রায় মঠের দেখা মেলে। এলাকাটি আবার ভারত সীমান্তের কোল ঘেঁসে। আমাদের এলাকার ইয়াং জেনারেশন বিকালের চা-খেতে নিয়মিত ভারতের ছোট বাজারগুলোতে যান বিডিআর ও বিএএসএফ'র সাথে সখ্যতার সুবাদে।

আমাদের গ্রামের চেয়ারম্যান ছিলেন বেশ দাপটের। বেসিক ডেমোক্রেসির বা আইয়ুবী আমলে একবার ইস্ট পাকিস্তান'র সেরা চেয়ারম্যান পেয়েছিলেন। পুরো নামটা মনে নেই। তবে পুরো জেলা জুড়ে উনার পরিচিতি ছিলো ছোট্ট মিয়া চেয়ারম্যান নামে। বাড়ীর সামনে দীর্ঘির সাথে পাল্লা দেওয়া বিশাল এক পুকুর। সে পুকুরে লাল শরীরের মানে বেশ বড়-বড় বয়সী রুই মাছ মিলতো। জেলা সদর থেকে ডিসি-এস ডিও আসতেন বড়শী শিকারে। যার বাড়ীর দোরগোড়ায় প্রশাসন গড়াগড়ি খায় তার দাপট সহজেই অনুমেয়।

পাকিস্তান হবার পর পরই হিন্দুরা রাতের অন্ধকারে সহায়-সম্পদ সব বিক্রি করে ভারত চলে যেতে থাকে। হিন্দুদের দাবী, মুসলিম লীগের নেতাদের চাপে বাধ্য হয়ে জলের দামে পৈত্রিক ভিটা বিক্রি করে তাদের চলে যেতে হয়েছে। কথাটা হয়তো কোনো কোনো ক্ষেত্রে সত্য। আবার কোনো কোনো হিন্দু এক জমি তিন-চারজনের কাছে বিক্রি করে অন্যদের মাথায় কাঁঠাল ভেঙে গেছেন। তবে যে যেইভাবেই গেছে, চেয়ারম্যান-মাতব্বরদের বখরা না দিয়ে সীমান্ত ডিঙাতে পারেননি। হিন্দুদের দেশ ছেড়ে যাবার এই মহোৎসবের সবচেয়ে বড় বেনিফিশিয়ারীদের একজন ছিলেন ছোট্ট মিয়া চেয়ারম্যান।

আমাদের সাথে উনাদের সরাসরি কোন আত্মীয়তা না থাকলেও শ্রেনীচরিত্রের কারণে বেশ মিলমিশ ছিলো। উনার ভাতিজা আদর ভাই তখন নিজের চাচাকে নির্বাচনে হারিয়ে দৌর্দভ প্রতাপের চেয়ারম্যান। সমবয়সী হবার কারণে আবার সাথে আদর ভাইয়ের যোগাযোগটা ছিলো নিয়মিত। সেই ছোট্ট মিয়া চেয়ারম্যান তখন মৃত্যু শয্যায়। মাসখানেক ধরে তিনি বেশ কষ্ট করছিলেন। একদিন চাটগা থেকে আমরা সপরিবারে বাড়ী এসেছি দাদা-দাদীকে দেখতে। খবরটা শুনে দাদাজানকে নিয়া আমরা গেলাম ছোট্ট মিয়া চেয়ারম্যানকে দেখতে।

ভদ্রলোক তখন কাঁটা মুরগীর মতো যন্ত্রণায় ছটফট করছিলেন। তার বিছানার চারপাশ জুড়ে আত্মীয়স্বজন, পাড়া-প্রতিবেশী। দিন রাত মোল্লা-মৌলভীরা কোরআন পড়ছেন, আল্লা-বিলাহ করছেন যাতে ভদ্রলোকের শাস্তির মৃত্যু হয়। উনার কষ্ট কারোরই সহ্য হচ্ছিলো না।

দাদাজানের কারো বাড়ীতে যাওয়া ছিলো বিরল কোনো ঘটনা। মুরীদরা পীরের বাড়ী যায়, পীরতো আর মুরীদের বাড়ীতে যায় না! অবশ্য ছোট্ট মিয়া চেয়ারম্যান বা তার সম্প্রসারিত পরিবারের কেউই দাদাজানের মুরীদ ছিলেন না। তবে অন্য আর সব মানুষের মতোই উনারা দাদাজানকে পীরের সম্মান দিতেন। দাদাজান খানিক দোয়া পড়লেন, বাঁড়ফুক দিলেন, দক্ষিণের জানালা খুলে দিয়ে উনাকে উত্তরমুখী করে শোয়ানের পরামর্শ দিলেন। কিছুতেই কিছু হচ্ছিলনা। ওখানে আরেকজন আলেম ছিলেন, যিনি সদ্য মিসরের আল-আজহার বিশ্ববিদ্যালয় ফেরৎ। ভাগ্যক্রমে আমাদের গ্রামেই উনার শশুরবাড়ী।

সবার কোঁতুলী নজর এড়িয়ে দাদাজান আর সেই আলেম মিলে বেশ খানিকটা সময় ধরে গোপন সলা-পরামর্শ করলেন। তারপর দাদাজান কাকে যেন ডেকে বললেন একটা পরিস্কার বেতের পাটি এনে উঠোনে বিছাতে। দাদাজানের নির্দেশে প্রবল পরাক্রমশালী ছোট্টমিয়া চেয়ারম্যানকে কয়েকজন আত্মীয়স্বজন মিলে শিশুর মতো তুলে এনে উঠোনে উত্তরমুখী করে শোয়ালেন (মুসলমানদের কবর উত্তরমুখী হয়)। দাদাজান কয়েকজন আলেম নিয়ে জোরে শোরে কোরআন তেলওয়াত করতে শুরু করলেন। মিনিট পাচেকের মাথায় ছোট্ট মিয়া চেয়ারম্যানের যন্ত্রণা লাঘব হতে থাকলো আর মনে হচ্ছিলো তিনি শান্তিতে ঘুমিয়ে পড়েছেন। তার আর কোন ব্যাথা-বেদনা নেই। মিনিট কতক পর মোল্লা-মৌলভীদের কণ্ঠে শুনলাম, 'ইল্লা লিল্লাহে..... রাজেউন।

পরে জেনেছি, ঘরে যে খাটটায় তিনি শুয়ে ছিলেন, সেটা জমিদার শশীনারায়ণের মায়ের শখের খাট ছিল। তিনি যখন গায়ের জোরে খাটটা তুলে আনছিলেন তখন বৃষ্টি নাকি অভিশাপ দিয়েছিলেন, ‘এই খাটে তোর কষ্টের মৃত্যু হবে’। সবই লোকমুখে শোনা। ব্যাপারটা হয়তো কাকতলীয়। হতে পারে হারাম-হালালের সংস্কার। পারে না?

----(চলবে)

দূরবীণে ভাসা জীবন – তিন

মেলবোর্ণ, অস্ট্রেলিয়া থেকে

আবিদ রহমান

‘দেশে’ যাবার দায়বদ্ধতা !

জীবন-জীবিকায় দেশের সাথে বনবাসী হয়েছি প্রায় দুই যুগ। তবে ‘নিয়মিত’ দেশে যাই, দেশে যেতেই হয়। বিরহের প্রথম দিকে এই যাওয়া ছিল ষান্নাবাৎসরিক। হালে ব্যাপারটি দ্বি-বার্ষিক। এক যদি নিয়মিত বলা যায়, তাহলে দেশের সাথে আমার যোগাযোগ নিয়মিত। এর বাইরে একমাত্র ভরসা শশুরবাড়ী। কারণ প্রায় প্রতিরাতে ভাই-বোনদের সাথে ফোনে কথা না বললে আমার জী নিদ্রাহীনতায় ভোগেন। সেই বাড়ীর নিউজ হেডলাইনগুলো আমাকে অবশ্যই শুনতে হয় গভীর মনযোগে, তবে “এক চোখা সেন্সরড ভার্সন”।

আমার শশুরপক্ষ রাজধানী ঢাকাতে স্থায়ী মাথা গোজার ঠাঁই করেছেন। প্রবাদ আছে, ভদ্রলোকদের রাজধানীতে বাড়ী থাকে। আমার পরিবার বোধকরি ভদ্রলোকের সংজ্ঞায় পড়েনা। তারা এখনও হয় গ্রামবাসী, নাহলে বড়জোর মফস্বলের পৌর-নাগরিক। কিছুদিন আগেও রক্ত-সম্বন্ধীদের সাথে যোগাযোগের একমাত্র মাধ্যম ছিল ডাকঘর: জুন মাসের পারিবারিক কুশলাদি জানতে হতো জুলাইয়ে। মাঝে-মাঝে পুরোটা পড়া যেতেনা বেদনাদায়ক হস্তাক্ষরের কারণে। ই-মেল যুগের সাথে আমার পরিজন এখনও পরিচিত হননি, কখনো হতে পারবেন কিনা জানিনা!

জীর নজর এড়িয়ে মাঝে মাঝে আত্মীয়-স্বজনরা কথা বলে, ওরা বলে আমি শুন- অবিকল বাংলাদেশ ও অস্ট্রেলিয়া সরকারের গল্প: এ-গল্প তাদের অভাব-অনটনের করুন কাহিনী। আমার ফোন বিলের শ্রাধ করে, ইনিয়ে-বিনিয়ে তারা ক্রমাগত বলে যায়, সাহায্য-সহযোগিতা চেয়ে যায়, আমি ধৈর্যের সাথে শুন। যে সকল মানুষের সংগে আমার কখনো পরিচয় হয়নি কিংবা পরিচয় ছিলনা, টেলিফোনে বারবার শুনতে শুনতে তাদের চিনে ফেলি। মাঝে মাঝে বিরক্তি ধরে, রাগও হয়, পরমুহুর্তে সামলে নেই, আমিও যদি ওদের কথা না শুন, তাহলে ওরা কার কাছে দাঁড়াবে, কোথায় যাবে! সমাজ-দেশ-সরকার কেউইতো তাদের কথা শুনেনা, শুনতে চায়না। শোনার আরোও একটা কারণ আছে, সেটাই মুখ্য কারণ-বাংলাদেশ থেকে আসা ফোনকে আমি ভীষণ ভয় পাই। দেশ থেকে আমার ফোন আসে দু’কারণে। হয় ঘনিষ্ঠ কারো মৃত্যুর সংবাদে নাহলে ‘আশু’ টাকার প্রয়োজনে। কখনো কোন সুসংবাদ কিংবা কারো জন্মের খবর দিতে দেশ থেকে কেউ আমাকে ফোন করেনা, করেনি অবধি।

আমরা যারা প্রবাসী, তারা নদী-ভাঙ্গা মানুষের মতো জীবনের নির্মম প্রয়োজনে বারবার ঠিকানা বদলাই-বোধকরি প্রবাসীদের জীবন যাযাবরের জীবনের মতো পিচ্ছিল, নুড়ি পাথরের মতো গড়ানো, চলার মধ্যেই থাকে, কোথাও থামেনা। কেবল মৃত্যু বা ধ্বংস এসে থামায়, তখন চিরতরেই থামে প্রবাসীর যাযাবর জীবন। আমাদের প্রজন্মের প্রবাসীদের অধিকাংশের যাত্রা শুল্লু অজপাড়া গাঁও থেকে। টিমটিমে বাতির মফস্বল ছুঁয়ে আমরা রাজধানী ঢাকাকে প্রথম নিবাস করি সুসভ্য নাগরিক হবার মোহে। প্রবাসী হবার পর ঢাকার মোহ আরো বাড়ে, প্রবাসের আধুনিক জীবনধারায় অভ্যস্তদের জন্যে গ্রামে রাত্রিবাস কল্পনাতীত এক দুঃস্বপ্ন, সেই নিরিখে রাজধানী ঢাকা মন্দের ভালো। তাই আমাদের কাছে দেশ মানে আদি ও অকৃত্রিম রাজধানী ঢাকা, দেশে যাওয়া মানে ঢাকায় যাওয়া, ঢাকায় থাকা। অবশ্যই আমরা গ্রামের বাড়ী যাবার কষ্টকর প্রক্রিয়া থেকে বিরত হইনা, অন্তঃত একবার হলেও বাবা-মা’র কবর জেয়ারত করে আসি, ঘটলায় বসে প্রতিবেশীদের সাথে কথোপকথনে লিপ্ত হই, রাতের আধারে পুকুরের মাছ চুরির গল্প শুন, নিজ গাছের কাঁচা নারিকেলের পানি খাই এবং সবশেষে দিনে দিনে অস্থায়ী বসত ঢাকায় ফিরে এসে শেষ করি ‘দেশে’ যাবার দায়বদ্ধতা।

দূরবীণে ভাসা জীবন – চার

মেলবোর্ণ, অস্ট্রেলিয়া থেকে

আবিদ রহমান

দায়বদ্ধতা !

একবার নাটকের টিকেট বিক্রির ধর্ণা দিচ্ছিলাম বাঙ্গালীর দ্বারে দ্বারে। এই সুবাদে অনেক ভিন্ন ধাঁচের মানুষের সাক্ষাৎ মিলেছিলো। অবশ্য তখনো মেলবোর্ণের বাঙ্গালী সমাজের সাথে পুরোপুরি পরিচয় নেই। কেবল নেতৃস্থানীয়দের নাম-ধাম জানি, আর চেনা-শোনা আছে বড় ভাইয়ের বন্ধু-বান্ধব ও শূভানুধ্যায়ীদের সাথে। এভাবে আমি অনেককে চিনি-জানি উনারা অবশ্য আমাকে চেনেনও না- জানেনও না। আমিতো আর নেতৃস্থানীয় কিংবা সাংস্কৃতিক দিকপাল নই! আমি হচ্ছি সামাজিক-সাংস্কৃতিক অনুষ্ঠানের কামলা। আমার মতো আরো কয়েকজন খেটে দেন, 'প্রতিভারা' সেই খাটাখাটুনির প্ল্যাটফর্মে মাইক্রোফোন হাতে লম্পজম্প করে থাকেন।

রক্ষণশীল হিসেবে মেলবোর্ণে বাঙ্গালীর সংখ্যা ৯ (নয়) হাজারেরও বেশী। অবশ্য এই সংখ্যার সিংহভাগ ছাত্র। তবে টিকেট কিনে অনুষ্ঠানে আসা বাঙ্গালীর সংখ্যা শ'খানেকেরও নীচে। অবশ্য যদি শাবনুর কিংবা রুনা লায়লার অনুষ্ঠান হয় তখন অনুষ্ঠানে হাজিরা দেওয়াটা ইঞ্জুরের ব্যাপার হয়ে দাঁড়ায়। এক বিনে পয়সার সামাজিক অনুষ্ঠানে এক মুখ চেনা ডব্লিউরট ভদ্রলোকের সংগে দেখা, ওখানে লোকজন 'ওয়ান ডিশ' নিয়ে আসেন। না আনলেও সমস্যা নেই, আয়োজকরা পর্যাপ্ত খাওয়ার ব্যবস্থা করে থাকেন। ভদ্রলোক বেশ উঁচুপদের সরকারী চাকুরী করেন। উনার চাকুরীও বেশ লোভনীয় বেতনের। দু'জনের মিলিত রোজগার ছয় অংকের ঘরে। এদেশে এসেছেন বছর সাতেক।

পরে শূনেছি, উনি কোনো দাওয়াতে যান না কিংবা কাউকে দাওয়াত দেন না। উনারা বাড়ী কিনবেন বলে সেভিংস করছেন। ভদ্রলোক যে গাড়ী চালান, তার 'প্রাইভেট সেল' মূল্য হবে বড়জোর এক হাজার। আমি ভদ্রলোককে অনুরোধ করলাম পঁচিশ ডলার দিয়ে একটা ফ্যামিলি টিকেট কিনতে। ভদ্রলোকের বিনীত উত্তর, 'ভাই, এখানে আপনাদের দু'টো নাটকের দল। আপনার টিকেট কিনলে উনাদেরটাও কিনতে হবে। সব মিলিয়ে বছরে ৫০/৬০ ডলার খরচ। বছরে এতগুলো টাকা এ্যাফোর্ড করাতো ভাই সম্ভব নয়। অনেক কথা চালাচালির পর ভদ্রলোক জানালেন, উনি এদেশে এসেছেন কমফোর্টেবল লিভিংয়ের জন্যে।

আমার রাগ হলো, বললাম, ভাই যদি বছরে ৬০ ডলারই করচ করতে গিয়ে আপনার 'কমফোর্টেবল লিভিং' বিনষ্ট হয় তাহলে বাংলাদেশে ফেরৎ গিয়ে সায়েন্স ল্যাবরেটরীর চাকুরীটা আবার নেন না কেনো? ভদ্রলোক আমতা আমতা উত্তর শুনে আমার মাথা গরম মেজাজ আরো বড়ে গেলো। বললাম, আপনি যে গাড়ীতে বউ-বাচ্চা নিয়ে শীতে-গরমে ঘুরে বেড়ান তাকে আর যাই বলেন, কমফোর্টেবল লিভিং বলে শব্দটাকে অপমান করবেন না। ছয়-সাত বছর এক ঘরে থেকে আপনি কী কমফোর্ট পাচ্ছেন জানিনা। অন্য এক গাউন্টকাটা বড়ভাই পাশ থেকে টিপ্পনী কাটলেন, ওনারা এখানে আসেন ফ্রি খাওয়ার লোভে। আমি নিশ্চিত উনি কোনো ডিশ আনেন নি। ভদ্রলোক এমনি মিনমিনে স্বভাবের, টিপ্পনি শুনে একেবারে মিহিয়ে গেলেন, সবসময়েইতো কিছু না কিছু আনি, আজ আপনার ভাবীর কাজ ছিলোতো, তাই কিছু আনতে পারেনি।

এই ভদ্রলোকের কথা শুনে যদি আপনার খারাপ লাগে। অন্য ভদ্রলোকদের কথা শুনলে নিশ্চয় আপনার চাঁদ তেঁতে উঠবে। বুশ ফায়ার এ্যাপিলের সময়কার কথা। এক ভদ্রলোকের কাছে কুড়ি ডলার চাইলাম। ভদ্রলোক বেশ রসিয়ে আমার সাথে একাত্মতা প্রকাশ করলেন। কিন্তু ডলার দিলেন না। বারবার তাগাদা দেওয়ার পর উনি জানালেন, উনাকে অনেক সোস্যাল কমিটমেন্ট মেটাতে হয় তাই ইচ্ছে থাকা সত্ত্বেও উনি আমাকে কোনো সাহায্য করতে না পারার জন্যে দুঃখিত। উনার বাচ্চা-কাচ্চা তিনটে। দীর্ঘদিন 'হেলথ কেয়ার কার্ডের' মালিক ছিলেন। সঙ্কল্পমক বেকারও ছিলেন দীর্ঘসময়।

বললাম, ভাই এদেশ আমাকে-আপনাকে অনেক কিছু দিয়েছে, এদেশের বিপদে-আপদে এগিয়ে আসা কী আমাদের কর্তব্য নয়। গত আট বছর এদেশের সরকারের কাছ থেকে বাচ্চাদের নামে, হেলথ কেয়ার কার্ডের সুবাদে, বেকার থাকার কল্যাণে কমবেশি পনেরো-বিশ হাজার ডলারতো খেয়েছেন, এর এক পার্সেন্ট বা দেড়শ ডলার দেয়া কী উচিত না? ভদ্রলোক খানিকটা মেজাজ চড়িয়ে বললেন, ভাই আমার অবস্থাটাতো বোঝার চেষ্টা করবেন। আমার অনেক সোস্যাল কমিটমেন্ট- প্রতি মাসে মাকে পাঁচ হাজার টাকা পাঠাতে হয়। বছরে একবার বড়ভাইয়ের দুই ছেলে-মেয়েকে কাপড়চোপড় দিতে হয়। এতসব খরচের পর হাতে কোন সেভিংস থাকে?

নিজের জন্মদাত্রীর ভরণপোষনকে যে মানুষ সোস্যাল কমিটমেন্ট হিসেবে দেখেন, তাঁর সাথে আমার আর কোনো কথা বলার প্রবৃত্তি হলোনা। যে মানুষ নিজের মা-মাটি ও মানুষ এবং রক্তসম্পর্কীয়দের ‘লায়বেলিটি’ মনে করেন, তিনি অন্য একটি দেশের মানুষের মানবিক প্রয়োজনে কতটুকু সাড়া দেবেন সে বিষয়ে আমার সন্দেহ আছে। আরেক ভদ্রলোক সদ্য বাংলাদেশ ঘুরে এসেছেন। বন্ধু-বান্ধব শুভানুধ্যায়ীদের জন্যে এনেছেন বে আকর্ষণীয় গিফট- গিফটগুলো হস্তান্তরের জন্যেই আমাদের সকলকে ডেকেছেন নৈশভোজে। টেবিল ভর্তি হরেক রকম খাবার। দু’তিন রকমের ডেজার্ট। খাওয়া দাওয়া শেষে উইক এন্ড নাইটের আড্ডায় বসলাম।

বাংলাদেশের রাজনীতি ইত্যাকার বিষয়ে অনেক গাল-গল্প হলো। তারপর হঠাৎ করেই এলো উনার পরিবারের কুশলাদির প্রসংগ। ভদ্রলোকের বাবা অনেক আগেই গত হয়েছেন। ঢাকার কাছের এক ছোট্ট জেলা শহরে উনার মা ও ভাইবোন থাকেন। গ্রামের বিশাল কৃষি আয় আর বাড়ী ভাড়া দিয়ে উনাদের দিন চলে যায়। কারো রেমিট্যান্সের উপর উনার মা-কে নির্ভর করতে হয় না। ভদ্রলোকের শশুরবাড়ী উত্তরবঙ্গের অজপাড়া গাঁয়ে। পরিবারের অধিকাংশ মানুষ শিক্ষিত হলেও আর্থিকভাবে অতটা স্বচ্ছল নন। তাছাড়া পরস্পর পরস্পরের সাথে তেমন যোগাযোগও রক্ষা করে চলে না।

ভদ্রলোক সপরিবারে মাসখানেকের উপর দেশে ছিলেন। উনি সময়ের অভাবে তিন ঘন্টার বাস যাত্রায় হাটের রোগী মা-কে দেখতে যেতে পারেন নি। ঢাকায় উনার বড়বোনের মেয়ের জন্মদিন উপলক্ষে তিন-চারদিন, উনার বাল্যবন্ধুর ছেলের বিয়ে-সাদীর ব্যস্ততায় সপ্তাহখানেক এবং সর্বোপরি শাশুড়ীর চোখের ছানির অপারেশনে উনার সাত-আট দিন সময় চলে গিয়েছিলো। তাছাড়া ভার্টিসিট জীবনের বন্ধু-বান্ধবের বাড়ীর দাওয়াত-সাওয়াতে ঢাকা সফরের পুরোটা সময় পার হয়ে গিয়েছিলো। উনি অবশ্য মা-কে খবর দিয়েছিলেন ঢাকায় এসে উনার সাথে দেখা করার জন্যে। কিন্তু সদ্য ষ্ট্রোক করা শরীর নিয়ে উনার মা ঢাকা আসার সাহস করেননি। তাই এ-যাত্রায় মা-র সংগে উনার দেখা হয়নি।

আপনারা দেশে বেড়াতে গেলে কী ‘সোস্যাল কমিটমেন্ট’ কিংবা ‘লায়বেলিটি’ মা-কে দেখতে ভায়রা ভাইয়ের গাড়ীতে চেপে পাঁচ-ছ’ঘন্টার বন্ধিমার্কী রাস্তা ভাংগেন।

দূরবীণে ভাসা জীবন – পাঁচ মেলবোর্ণ, অস্ট্রেলিয়া থেকে আবিদ রহমান ‘সাংবাদিক’

নিজের হাসির মতোই নির্মল, আন্তরিক ও খোলামেলা কবি রফিক আজাদের হৃদয়। ছিয়াত্তরে যখন প্রথম ঢাকা শহরে কবি হতে আসি, তখন হাতে গোনা যে ক’জন কবির সাথে পরিচয়ের সৌভাগ্য হয়েছিল, কবি রফিক আজাদ তাদের অন্যতম। সম্পর্কটা কখনোই কেনো জানিনা গভীরতার দিকে না গিয়ে ‘অসম্ভবের পায়ের আটকে পড়েছিলো। তখন আমাদের মতো উঠতি কবিদের একমাত্র স্বপ্ন ছিলো বাংলা একাডেমী থেকে প্রকাশিত ‘উত্তরাধিকার’-এ লেখা ছাপা। আর রফিক আজাদ সেই ‘উত্তরাধিকার’র সহ-সম্পাদক! অবশ্য সেই সময়কার বাংলা একাডেমীর সবাই-কবি আসাদ চৌধুরী, কবি মুহম্মদ নুরুল হুদা, আবৃত্তিকার ফরহাদ খান, কণ্ঠশিল্পী রফিকুল আলম, সকলেই ছিলেন সজ্জন, বন্ধুবৎসল ও উদার। আমাদের প্রজন্মের বেড়ে উঠার পেছনে উনাদের অবদান অতুলনীয়। মনে পড়ে রফিক আজাদের রুমেই ‘অলৌকিক স্টীমার’ খ্যাত কবি হুমায়ূন আজাদের সংগে প্রথম পরিচয়।

সালটা বিরশি বা তিরশি হবে। দেশ জুড়ে এরশাদের সামরিক শাসন। ততদিনে প্রথমা গিননির ছেঁড়া পেটিকোটে দুঃখে বেশি মাইনের টানে রফিক আজাদ যোগ দিয়েছেন ইত্তেফাক গ্রুপের সাপ্তাহিক ‘রোববার’-এ। সম্পাদক স্ব-খ্যাত রাহাত খান। রফিক ভাইয়ের সংগে আছেন চির অমায়িক চিত্রশিল্পী কাজী হাসান হাবীব, ভুল বোঝার মতো ব্যবহারের সদাহাস্যময় কবি ইকবাল হাসান, চিরতরুন-তুমুল-তুখোড় ইমদাদুল হক মিলন। লেবু-চা আর ওনাদের আড্ডার টানে আমরা চুটতাম ইত্তেফাক ভবনে। অবশ্য মনের গহীন কোনে লুকিয়ে থাকতো লেখা ছাপাবার দুর্নিবার ইচ্ছে। যাওয়া-আসার মাঝে কখন যেন উনাদেরই একজন বনে গেছি মনে নেই। যখন হাত টানাটানি হতো তখন রফিক ভাই বা মিলন ভাই অনুবাদের কিছু একটা গছিয়ে দিতেন। ৫০/৭৫ টাকা তখন আমাদের মতো তরুনদের জন্যে অনেক। স্টার সিগারেটের প্যাকেট তখন দেড় টাকা। দুপুরে ভর পেট খেতে লাগে পাঁচ টাকা।

এর কিছুদিনের মধ্যে আমরা একঝাঁক তরুন প্রেসিডেন্ট জিয়ার পত্রিকা ‘দৈনিক দেশ’-এ ঢুকে পড়ি। কবি সমুদ্রগুপ্তের নিপুন মাষ্টারীর গুনে তিন মাসের মাথায় আমি পুরো দস্তুর রাতের শিফটের সাব-এডিটর। রয়টার, এপি, এএফপি, বাসস-এর অনুবাদের পাশাপাশি আমি শিল্প-সাহিত্যের মোষ তাড়াই সাহিত্য সম্পাদক কবি হেলাল হাফিজের টেবিলে। কখনো দৈনিক বাংলায় কবি আহসান হাবীব কিংবা সহকারী কবি নাসির আহমেদের রুমে। তবে দৈনিক বাংলা ভবনে আমাদের বেশী টানতেন কিংবদন্তি প্রচ্ছদশিল্পী সৈয়দ লুৎফল হক। আমাদের শূন্য পকেটের দিনগুলোর মধ্যাহ্নভোজগুলো ছিল লুৎফল হকের অবদান। অনুবাদের কাজটায় তত দিনে আমি বেশ দক্ষ হয়ে উঠেছি।

পত্রিকাসূত্রে কিছু পুরোনো রিডার্স ডাইজেস্ট পেয়েছিলাম। আমার পাল্লায় পড়ে ওগুলোর দাম উঠে গিয়েছিলো। সাপ্তাহিক রোববার তখন ‘আমাদের জেলা’ নামে একটা ধারাবাহিক প্রচ্ছদ কাহিনী করছিলো। দৈনিক দেশ-এ আমাদের বিশ্ববিদ্যালয় রিপোর্টার ছিলেন সহপাঠী বন্ধু মির্জা তারেক। বেচারি বুয়েটের জনসংযোগ বিভাগের লোভনীয় চাকুরীতে ইস্তফা দিয়ে এখন মিডিয়া সাংবাদিক প্রশিক্ষণ নিয়ে ব্যস্ত হাবুডুবু সময় কাটাচ্ছেন। তারেক আমাদের কী এক অদ্ভুত কারণে আবু ডাকে। আমি ডাকি পুত্র।

আমাদের দুজনেরই তখন টাকার বেশ টানাটানি চলছিলো। তিন বেলা বাংলা মদ, ইউনোকটিন আর গাঁজা-চরসের নেশা মেটানোর পর বেতনের তেরোশোত চল্লিশ টাকায় কিভাবে মাস কাটে! তারেক অবশ্য এসব কিছু মুক্ত, সুবোধ বালক। তবু সেসব দিনগুলোতেও বিশ্ববিদ্যালয় রিপোর্টারের সাড়ে তিনশ টাকায় স্বচ্ছল জীবন-যাপন সম্ভব হতোনা। নয় হাজার টাকার লোভে কবি রফিক আজাদের দরোজায় ধর্না দিলাম। কাজটা পেয়ে গেলাম। সংগে সম্পাদক রাহাত খানের ‘টু হুম ইট মে কনসার্ন’ মার্কা চিঠি।

নোয়াখালী তারেকের নিজের জেলা শহর। অনেক বন্ধু-বান্ধব আছে। তাছাড়া আমাদের ‘দৈনিক দেশ’র জেলা প্রতিনিধি জুবায়েরতো আছেই (নামটা ভুল হলে মফ করে দেবেন)। আমি নিজেও নোয়াখালী জেলাটা বেশ ভালোই চিনি একজন ব্যারিস্টার মন্ত্রীর কল্যাণে। মন্ত্রী মহোদয়ের সাথে বহুবার নোয়াখালী এসেছি। এছাড়া আছেন সাবেক প্রধানমন্ত্রী বেগম খালেদা জিয়ার প্রেস সচিব ও সাবেক সাংবাদিক আহমেদ নজীর ভাইয়ের অকাতর সহানুভূতি। আটসাত বেঁধে এক সম্মুখ্য নোয়াখালী পেঁছালাম। তখন একমাত্র জনপ্রিয় পত্রিকা ইত্তেফাক। ইত্তেফাক গ্রুপ থেকে এসেছি বলে কথা! কোন কথাবার্তা ছাড়াই সোজা সার্কিট হাউজে। আগে খবর দেওয়া ছিলো কিছুক্ষণের মধ্যে ‘দৈনিক দেশ’ প্রতিনিধি জুবায়েরের ফিফটি সিস মোটর সাইকেলে পেছনে চেপে ইত্তেফাকের প্রতিনিধি এসে হাজির। এর আগে অবশ্য এসে হাজির হয়েছে আমাদের ঘনিষ্ঠ বন্ধু অধুনালুপ্ত ত্রৈমাসিক অবয়ব সম্পাদক হাসিখুশী হাসেম।

রাতের মধ্যেই জুবায়ের পুরো নোয়াখালী জেলা প্রশাসন গরম করে ফেললেন। আমাদের দু’জনের জন্যে ফুল টাইম একটা গাড়ী, ভালো খাবার-দাবার ইত্যাকার ব্যবস্থার দাবীতে খোদ জেলা প্রশাসককে তটস্থ করে ফেললেন জুবায়ের। মফঃস্বল সাংবাদিকদের দাপটের কথা অনেক শুনেছি। কিন্তু চর্ম চক্ষে এই প্রথম দেখা। দিন দশেকের মতো আমরা নোয়াখালীতে ছিলাম। প্রতিরাতে সব পত্রিকার মফঃস্বল সংবাদদাতাদের সাথে আমরা নিবিড় আড্ডায় ব্যস্ত হতাম। তখনকার মফঃস্বল সংবাদদাতারা কোন নির্দিষ্ট পারিশ্রমিক পেতেন না।

বড় কাগজের উনারা বড়জোড় লাইনেজ পেতেন অর্থাৎ সংবাদ ছাপার বিপরীতে মুদ্রিত লাইন অনুযায়ী পয়সা। বিনে পয়সার এই চাকুরী অনেকে করতেন মান-সম্মানের জন্যে। অনেকে প্রশাসনকে প্রভাবিত করে ব্যবসা বানিজ্য বাগাতে সাংবাদিক হতেন। অগ্রজপ্রতিম সহকর্মী গল্পকার ও অধ্যক্ষ দেওয়ান আজরফের সুযোগ্য পুত্র আবু সায়ীদ জুবায়েরী অবর্তমানে সপ্তাহখানেক মফঃস্বল সম্পাদকের দায়িত্ব পালন করতে হয়েছিলো। মফঃস্বল প্রতিনিধিরা ‘ভুল করে’ ফাইভ ফিফটি ফাইভ’র প্যাকেট টেবিলে ফেলে যেতেন। অফিসে ঢুকেই নিউজ ডেস্কের সবার জন্যে কাবাব-পরোটা-পুри-চা আনাতেন।

মফঃস্বল সাংবাদিকরা নিজেদের ভাবেন ডিসি সাহেবের সমকক্ষ। আমাদের মতো ঢাকা থেকে আগত সাংবাদিকরা ওনাদের চোখে মন্ত্রী-মিনিস্টারের সমতুল্য। আমরা ‘দৈনিক দেশ’ এর ঢাকার সাংবাদিক আর জুবায়ের ‘দৈনিক দেশ’এর নোয়াখালীর জেলা সংবাদদাতা। তাই আমাদের সুবিধা-অসুবিধার বিষয় নিয়ে দিনে দু’তিনবার জেলা প্রশাসককে মোটামুটি হামলে পড়তেন। বেচারি জুবায়েরতো জানতেন না, জেলা প্রশাসক কাশেম সাহেব ‘দৈনিক দেশ’এর নতুন মালিক সাবেক মন্ত্রী মাইদুল ইসলামের ভগ্নিপতি এবং বোর্ড অব ডাইরেক্টরসের একজন। পরে কাশেম সাহেব যখন চাকুরী থেকে অবসর নিয়ে ‘দৈনিক দেশ’ এর সম্পাদক হয়েছিলেন তখনো জুবায়ের নোয়াখালীর জেলা সংবাদদাতা।

অপারেশন ক্লিন হাটের কিছু সময় পর এক জেলা সদরে এক মাঝারী গোছের সন্ত্রাসী ধরা পড়লো। সেদিন হয়তো লীড নিউজের আকাল ছিলো। মোটামুটি সবগুলো দৈনিকের প্রথম পাতায় ছবিসহ সন্ত্রাসীর ছবি ছাপা হলো। পরের দিন এক পত্রিকার সাথে পাল্লা দিয়ে আরেক পত্রিকায় সেই সন্ত্রাসীর অপকর্মের কাহিনী ছাপা হতে থাকলো। জেলা সংবাদদাতাদের সংগে যুক্ত হলো ক্রাইম রিপোর্টারদের অনুসন্ধানী প্রতিবেদন। দেশের পাঠক হামলে পড়লো এই ‘নব্য গড ফাদারের’ কাহিনীতে। পত্রিকার পাতায় চোখ বুলালে মনে হতো ঐ সেই সন্ত্রাসী যেন ‘আরেক দাউদ ইব্রাহিম’। কম্পনাকে হার মানায় এমন সব তথ্য প্রকাশিত হতে থাকলো নির্ভরযোগ্য সূত্রের বরাত দিয়ে এবং তদন্তের স্বার্থে উল্লেখযোগ্য অগ্রগতি পত্রিকার পাতায় ছাপা হতো না, তবে নিশ্চয় পাঠকের কৌতূহল বাড়িয়ে তুলতো পরের দিনের সংবাদপত্রের জন্যে।

বাদবাকী কাহিনী আমার এক অনুজপ্রতিম মফঃস্বল সাংবাদিকের মুখে শোনা। তিনদিনের রিমান্ডের পর ঐ সন্ত্রাসীকে আদালতে তোলা হচ্ছিলো। পুরো আদালত প্রাঙ্গণ জুড়ে সাংবাদিক ও ফটোগ্রাফারের ভীড়। সন্ত্রাসীর এক চেলা সেই সাংবাদিককে এক কোনে ডেকে নিলো। এক্সক্লুসিভ খবরের আশায় সেই সাংবাদিক অনুজ তখন সেই শিষ্যের সাথে পারলে দুনিয়ার ওপারে যায়। শিষ্যটি সেই সাংবাদিকের হাতে নগদ কুড়ি হাজার টাকা গুজে দিয়ে বললো, ভাই, একটা ছোট্ট অনুরোধ রাখতেই হবে। প্লিজ না বলবেন না। এতগুলো টাকা কেউ হাতের মুঠোয় গুজে দিলে তাকেতো মুখের ওপর না বলা যায়না! শিষ্য যা বললো, তাতে পিলে চমকে উঠে- ভাইর সম্পর্কে কিন্তু দু’একটা কথা বাড়িয়ে লিখতে হবে। যেমন ধরুন; ভাই তিনটে মার্ডার করেছেন।

দু’তিনটে রেপও জুড়ে দিতে পারেন। কয়েকটা গুম কেস লাগিয়ে দিলে ব্যাপারটা আরো বেশী পাকাপোক্ত হবে। শুনতেতো সেই সাংবাদিক থ- ব্যাটা উজবুক নাকি, যা বলছে তার অর্থ জানে, মাথা ঠিক আছে কী? সাংবাদিক বন্ধুটিকে চিন্তিত দেখে শিষ্য বললো, ভাই কাজটা কিন্তু করতে হবে। এখন আমাদের এতো রোজগার নেই। টেলিফোন করলে বড় জোর পাঁচ হাজার টাকা চাঁদা পাওয়া যায়, আপনি যদি ঠিকঠাক মতো লিখতে পারেন, তাহলে ভাইর এক ফোনে তিরিশ হাজার টাকা উশুল। থানা-পুলিশ লেভেলেও ভাইর স্ট্যাটাস বেড়ে যাবে। বলতে পারেন, ভাইর জন্যে আপনার লেখা হবে বিজনেস প্রমোশন। বলতে পারেন, আমাদের ‘সম্মবাদিক’ ভাইয়েরা বুঝে না বুঝে কত সন্ত্রাসীর বিজনেস প্রমোশনে নিরলস ভূমিকা রেখেছেন?

দূরবীণে ভাসা জীবন - ছয়

মেলবোর্ণ, অস্ট্রেলিয়া থেকে

আবিদ রহমান

নাক তোলা মানুষ

ছোট বেলায় পশ্চিম বংগের মানুষ নিয়ে বেশ কৌতুক শুনছি- সব কটি কৌতুকের মূল প্রতিপাদ্য ছিলো পশ্চিমবংগের দাদা-দিদিদের কাজ-কারবার। বড় হয়ে জেনেছি পুরোটাই গাল-গল্প নয়, বেশীর ভাগ সত্যের সাথে কিছুটা রস মেশানো। চাঁটগায় আমাদের এক নিকট প্রতিবেশী ছিলেন অজয় দাশ। বেশ আলাপ পরিচয় ছিলো- উনার পুরো পরিবার সাতচলিশ সালে ভারত চলে গেছেন। কী কবে অদ্ভুত কারণে উনার যাওয়া হয়ে উঠেনি। অজয় বাবুর মুখে সারাক্ষণ তাঁর দাদা-দিদির কিছা। শুনতে শুনতে এক সময় মনে হতো ওনারা বোধহয় আমাদেরই দাদা-দিদি।

আমাদের আরেক নিকট প্রতিবেশী রহমত ভাই (ক্যাপটেন, বর্তমানে লস এঞ্জেলসবাসী) মেরিন একাডেমী পাশ দিয়ে জাহাজের ক্যাডেটের চাকুরী পেলেন বাংলাদেশ শিপিং লাইনসের এক জাহাজে। জাহাজের নামটা মনে নেই, তবে মনে আছে সালটা ১৯৭৮ আর জাহাজটা চাটগাঁ-সিংগাপুর-কলকাতা রুটে নিয়মিত চলাচল করতো। অজয় বাবু সংবাদটা পেয়ে বেশ উৎফুল, রহমত ভাইয়ের হাতে চিঠি ও ঠিকানা দিলেন, পইপই করে অনুরোধ করলেন যেন উনার দাদার সঙ্গে একবার দেখা করে আসে। সকালে যাবে, সারাদিন থাকবে-খাবে, রাতের ভোজন শেষে তারপর তোমার জাহাজে ফিরবে। বাংলাদেশের মানুষ অজয় বাবু কি তখন জানতেন পশ্চিম বংগের মানুষ কেমন হয়!

যথারীতি একদিন রহমত ভাইয়ের জাহাজ কলকাতা বন্দরে ভিড়লো। সম্ভবতঃ তখন কলকাতার সিনেমা হলগুলোতে ‘ববি’ চলছিলো। ক্যাডেটের চাকুরী-জাহাজের সবাই ক্যাডেটের উপর মাতব্বরী করে। বহু ক্যাপটেন ছুটি ম্যানেজ করলেন রহমত ভাই ও তার অন্য আরেক ক্যাডেট বন্ধু। দু জনের কেউই কখনো হিন্দি সিনেমা

দেখেননি। কেবল হিন্দি সিনেমার গল্প শুনছেন। প্যান করলেন আজ 'ববি'র ম্যাটেরি শো মারবেন। কারণ কাল রাতেই জাহাজ কলকাতা ছাড়বে। এদিকে অজয় বাবুর দাদার বাড়িতে না গেলে চাটগাঁয় মুখ দেখানো মুশকিল হয়ে পড়বে। খালি হাতে যাওয়া উচিত হবেনা ভেবে জাহাজের কুককে পটিয়ে বড় দুটো ইলিশ মাছ সাথে নিলেন। জাহাজের এজেন্টের গাড়ীতে চেপে গেলেন অজয় বাবুর দাদার বাড়ীতে। সেই বাড়ীতে দুপুরে খাবেন বলে জাহাজে কিছুই খেলেন না। ইলিশ দুটো দেখে অজয় বাবুর দাদা-বৌদির সেকি উলাস আর আনন্দ। কিছুক্ষণ গল্প-গুজব হলো। খাবারের নাম গন্ধ নেই। এদিকে ম্যাটেরি শো'র সময় ঘনিয়ে আসছে। রহমত ভাইর বন্ধু লজ্জা-শরমের মাথা খেয়ে জানালেন, তাদের আধঘন্টার মধ্যে উঠতে হবে। শুনে অজয় বাবুর বৌদি বলেন, যাও ভাই, এবার না বলে এলে, আগামীবার আসলে কিন্তু চা-নাস্তা খেয়ে যেতে হবে।

এধরনের আরো অনেক গল্প শুনছি পশ্চিমবঙ্গের মানুষ নিয়ে। আমার বন্ধু কবি সোহেল অমিতাভের সংগে কলকাতার এক প্রথিতযশা কবির বেশ দহরম-মহরম ছিলো। কবির দু'মেয়ে আর তাদের শশুর-গলগ্রহ জামাই সোহেলের ঢাকা বাসায় দিব্যি একমাস কাটিয়ে গেলেন রাজকীয় আতিথেয়। সোহেলের তখন রমরমা ম্যানপাওয়ার ব্যবসা। সদ্য বিয়ে করেছেন বেবী নাজনীনকে। দিনে নামী-দামী হোটেলের খাবার আর রাতভর ব্যাক লেভেলে ডুবে থাকার মধ্যেই একসময় তাদের বাংলাদেশ ভিসা শেষ হলো। আমি তখন সোহেলের বাসায় থাকি। ফলে আমার কপালেও মিলেছে রাজসিক ভোজন। বছর খানেক পর সোহেলসহ আমরা কলকাতা গেলাম মঞ্চ নাটক দেখতে। আমাদের মাথায় তখন গ্রুপ থিয়েটারের ব্যারাম। সপ্তাহ খানেক ছিলাম, কবি পরিবারের সদস্যরা নিয়মিত আমাদের হোটেলে আসা-যাওয়া করেছে। আমাদের ডিউটি ফ্রি ব্যাক লেভেলগুলো সাবাড় করে গেছেন নির্দিধায়। কিন্তু ভুলেও একবার বাড়ীতে নেমস্ত্রন করেননি।

অবশ্য ব্যতিক্রম পেয়েছিলাম ক্যাপটেন হ্যারি বোসকে। হংকংয়ের একটা শিপিং কোম্পানীতে কাজ করতেন। দিব্যি ফুর্তিবাজ টাইপের। স্ত্রী-কন্যা কলকাতায় রেখে উনি থাকতেন ফিলিপিনো গালফ্রেন্ডের সাথে। দু'হাতে টাকা না উড়ালেও খরচ করার মানসিকতা ছিলো। একবার উনি বিনাধিধায় আমাকে এক লাখ হংকং ডলার ধার দিয়েছিলেন। ভদ্রলোকের একটা পা কেটে ফেলতে হয়েছে ২০০০ সালে। তারপর থেকে উনি কলকাতায় থাকেন। ২০০৩ সালে আমাকে একবার মুম্বাই ও চেন্নাই যেতে হয়েছিলো। হ্যারি বোসের সংগে দেখা করার জন্যেই আমি কলকাতায় যাত্রা বিরতি নিয়েছিলাম। আমার সংগে ছিলেন আমার আরেক জাহাজী বন্ধু ক্যাপটেন আমির।

হ্যারি বোস ও আমি পরস্পরকে দাদু বলে ডাকি। দাদু কোনভাবেই আমাদের হোটেলে উঠতে দিলেননা। টেনে নিয়ে গেলেন বাড়ীতে। তখন দুপুর। টেবিলে খাবারের আয়োজন দেখে ক্যাপটেন আমিরের চোখ ছানাবড়া। তার পূর্বপুরুষরা বায়ান্ন সালে কলকাতা থেকে ঢাকা গিয়েছেন তবু স্বভাবে-চলনে আমিরের গায়েও তখনো কলকাতার গন্ধ! রাতে তিনি আমাদের নিয়ে গেলেন দামী এক খাবার খাওয়াতে। ভাবতে ভালোলাগে পশ্চিমবঙ্গে ক্যাপটেন হ্যারি বোসের মতো উদার দাদুও আছেন। কারণ সব সমাজেই দু'একটা ব্যতিক্রম থাকে।

পশ্চিমবঙ্গের সাথে আমার কোন ব্যক্তিগত লেনদেন কিংবা উঠাবসা নেই। তবে মেলবোর্ণে এসে আবার পশ্চিমবঙ্গের নিয়ে পড়তে হলো। পশ্চিমবঙ্গের দাদা-দিদিরা নিজেদের বাংলা ও বাংলা সংস্কৃতির পথিকৃৎ দাবী করে থাকেন ভাবসাবে। বাংগালীদের আয়োজনে ও খরচায় অনুষ্ঠানগুলোতে দেখি মাইক্রোফোন হাতে উনাদের লক্ষ্যবিক্ষেপ। শুনি ওনাদের অনুষ্ঠানের টিকেট বিক্রি করতে উনারা বাংগালীদের শরণাপন্ন হন (বাংলাদেশের মানুষই বাংগালী, পশ্চিমবঙ্গের বাংলাভাষীরা বাংগালী নয়, হিন্দি-বাংলার খিচুড়ি মেলানো ভারতীয়। বাংলা ভাষায় কথা বলতে পারলেই যদি বাংগালী হওয়া যেতো তাহলে ইংরেজীভাষী অজি ও আমেরিকানদের বলতে হবে ইংলিশ)। বাংলাদেশের মানুষ না গেলে কলকাতা থেকে আনা শিল্পীদের পারিশ্রমিকের টাকা উঠেনা- টিকেট বিক্রির সময় সেকি সমধুর সুর, দাদা আমাদের অনুষ্ঠানে আসছেন তো? কিন্তু বাংগালীদের কোন অনুষ্ঠানে উনারা টিকেট কেটে আসেন না, যদিওবা আসেন সর্বোচ্চ হাতে গোনা পাঁচ-ছয়জন।

ভাবখানা এমন (বাংলাদেশের) বাংগালীরা নমশুদ্র আর পশ্চিমবঙ্গের উনারা ব্রাহ্মণ। কেবল কি সাংস্কৃতিক অনুষ্ঠানাদি? সামাজিকভাবে উদার বাংগালীরা উনাদের পূজোয় যায় শুভেচ্ছা জানাতে। উনারা শিখেননা সামাজিক সম্পর্কের রীতিনীতি। আমাদের উনারা সম্মান করেন দাদা-বৌদি ডেকে। তবে আমরা নারায়ণ ভাই ও কল্যাণী ভাবী ডাকলে উনাদের সম্মানে লাগে। আমাদের বাড়ীতে নেমস্ত্রন খেতে এলে উনারা বলেন, বৌদি একটু জল দেবেন। আমরা যদি আমাদের বাড়ীতেই উনাদের উপস্থিতিতেই বলি ভাবী পানির জগটা দিন না, ওনাদের অপমানে লাগে। উনাদের কেনো এতা নাক উঁচু ভাব?

পশ্চিমবঙ্গের মানুষ নিয়ে আরেকটা গল্প বলেছিলেন। একটি দৈনিকের ক্রীড়া সাংবাদিক। ইডেনে ভারতের সাথে খেলছিলো ওয়েস্ট ইন্ডিজ। বাজে একটা শট খেলতে গিয়ে শচীন অল্প রানে এলিবিডাবলু। দেখে এক পাড়াতো

দাদা বলে উঠলেন, কি বাজে শটটাই না খেললো শচীন, ওকে বলতে হবেতো। ভাবখানা এমন একটু পরেই উনার সাথে শচীনের দেখা হয়ে যাবে। পশ্চিমবঙ্গের মানুষের আর যা-কিছুরই ঘাটতি থাকুক ভাব-ভংগিমার ঘাটতি নেই। আমরা ডাইভারদের জন্যে সেমাই-সুজি রান্না করি। ওনারা সেই সুজির হালুয়াকে আহলাদে বলেন, মোহনভোগ। আজ কি দিয়ে খেলেন জিজ্ঞেস করলে জবাব দেন, সকালে ছাতু দিয়ে লংকা (কাঁচা মরিচ) মারলাম আর দুপুরের আস্ত ডিমের অর্ধেক দিয়ে ভাত। অর্ধেক ডিমের ব্যাপারটা ঢাকা পড়ে থাকে ‘আস্ত ডিমের’ আবারণে। নিঃস্ব দীনহীন গরীব বাঙালী যখন তীব্র অভাবে থাকে তখনো বাধ্য না হলে কাঁচা মরিচ দিয়ে শুকনো আটা খায়না। আর তারা পর্বের সাথে তা উচ্চারণ করে ব্যাপারটিকে কোলিন্য দিতে চান।

একবার এক বাসায় দাওয়াতে গেছি। সেখানে পশ্চিমবঙ্গের এক ভাবী ছিলেন। চিংড়ির চর্চরি দেখে উনার সেকি উলাস। বোর্দি এতো বড় চিংড়ি পেলেন কোথায় বলুন। বড় সাইজের চিংড়ি না পেয়ে এগুলো এনেছেন বলে এতক্ষণ হোষ্ট পরিবারের মধ্যে ঠান্ডা মন কষাকষি চলছিলো। কলকাতার ভাবী যে সাইজের চিংড়ির কথা বলছিলেন, স্প্রিংভ্যাল বাজারে সেগুলো গড়াগড়ি খায়। কত অপ্রশস্ত হৃদয়! দশ ডলার খরচ বাঁচাতে কত কোমরবাঁধা কসরত, এতে যদি শিল্প-সংস্কৃতি গোলায় যায়তো যাক। এই একতরফা ব্যাপারটার অবসান হওয়া দরকার। অনেকে হয়তো বলবেন, কেন উনারা সেদিনতো বাঙালীদের অনুষ্ঠানে গিয়েছেন বন্যার গান শুনতে। আসলে উনারা বন্যাকে নিজেদের একজন ভেবেই গেছেন। একেতো রবীন্দ্র সংগীত শিল্পী তার ওপর শান্তি-নিকেতনের ছাত্রী, বন্যার অনুষ্ঠানেতো উনারা যাবেনই। উনারা গেছেন বাঙালী বন্যার কৃতিত্ব নিজেদের দাবী করতে, শত হোক ওপর শান্তিনিকেতনের ছাত্রী।

জানি কেউ কেউ বলবেন আমি অত্যন্ত নীচুমনা একজন মানুষ। একজন সাম্প্রদায়িক ব্যক্তি। বলুন তাতে কোন দুঃখ নেই, তবে তার আগে মনে করে দেখুন বাঙালীদের কোন অনুষ্ঠানে পশ্চিম বঙ্গের কুড়ি জন মানুষ টিকেট কেটে এসেছেন কিনা।

E-mail: abid.rahman@ymail.com